



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

კახეთის საერისთავო

კახეთის საერისთავო, ტერიტორიულ-ადმინისტრაციული ერთეული შუა საუკუნეების საქართველოში. თავდაპირველად შეიქმნა ბაგრატ III-ის მიერ 1010–14 შორის. მას შემდეგ, რაც კახეთ-ჰერეთი ისევ ჩამოსცილდა ერთიან საქართველოს, კვირიკე III დიდმა კ. ს. გააუქმა. მისი აღდგენა მოხდა დავით IV აღმაშენებლის მიერ, კახეთ-ჰერეთის შემოერთების შემდეგ, დაახლ. 1104–05. თამარის მეფობის დასაწყისში კახეთის ერისთავობა დაგანისძეთა საგვარეულოს ხელშია. წყაროებში მეტად მწირი ცნობებია დაცული კ. ს-სა და მისი ერისთავების შესახებ. სავარაუდოდ, კახეთის ერისთავები იყვნენ ბაკურ დაგანისძე (XII ს. 80-იანი წლები), ეგარსლან ბაკურციხელი (XIII ს. I ნახ.), ივანე აბულეთისძე (XIII ს. 50-იანი წლები), თორღვა პანკელი (XIII ს. 60-იანი წლები). წყაროებით არ დასტურდება მოსაზრება (პ. ინგოროყვა), რომ კახეთის ერისთავები 1255-იდან XIII ს. ბოლომდე იყვნენ უჯარმელები, მათ შემდეგ კი – ბურსელები. კ. ს-ს უნდა ეარსება XV ს. 60-იანი წლების ბოლომდე, ვიდრე კახეთის მეფე გიორგი I-მა სამეფოში ადმინისტრაციული რეფორმა არ ჩაატარა – გააუქმა საერისთავოები და შექმნა სამოურავოები.

წყარო: ისტორიანი და აზმანი შარავანდედთანი, წგ.: ქართლის ცხოვრება, ს. ყაუხჩიშვილის გამოც., ტ. 1, თბ., 1955; ვახუშტი, იქვე, ტ. 4, თბ., 1973; ჟამთააღმწერელი, იქვე, ტ. 2, თბ., 1959.

ლიტ.: ბ ა ხ ტ ა ძ ე მ., ერისთავობის ინსტიტუტი საქართველოში, თბ., 2003; ი ნ გ ო რ ო ყ ვ ა პ., რუსთველიანა, თბზ., კრ., ტ. 1, თბ., 1963.

მ. ბახტაძე
